

**Grønlands Tekniske Organisationi pillugu Inatsisartut peqqussutaata
allanngortinneqarneranik Inatsisartut peqqussutissaattut siunnersuummut
nassuiaatit**

Nassuiaatit nalinginnaasut

Ukiup ingerlanerani erngup akiisa allannguutissaat
atortussanngortinneqannginneranni Inatsisartut Aningaasaqarnermut
Ataatsimiititaliaannut akuerisassanngorlugit saqqummiunneqartarput.

Naalakkersuisut erngup akiisa akuersissutigineqartarnerata allanngortinneqarnissaa
siunnersuutigaat taamaaliornikkut erngup akii atuutilersinneqannginneranni
Inatsisartut Aningaasaqarnermut Ataatsimiititaliaannut akuerisassanngorlugit
saqqummiunneqartarunnaarsillugit: taamaallaalli Naalakkersuisunut
akuerisassanngorlugit saqqummiunneqartalersussanngorlugit.

Allanngortitsineq imeq pillugu akuersissutigineqartarnermut
eqaannerulersitseqataassaaq, aammalu innaallagissap, erngup ungasissumillu
kiassarneqarnerup akiisa akuersissutigineqartarneranni malittarisassat
assigiilersinneqassallutik. Innaallagissap, ungasissumit kiassarneqarnerup aammalu
nalunaarasuartarnikkut sullinneqarnerit akiisa allannguutaat atuutilinnginnerminni
Inatsisartut Aningaasaqarnermut Ataatsimiititaliaannut
saqqummiunneqartarunnaareerput.

Innaallagissap, ungasissumit kiassarneqarnerup erngullu akiisa allannguutaat
Naalakkersuisunit akuerisat tusagassiorfiit aqputigalugit saqqummiunneqartarnerat
ingerlaannassaaq.

Aningaasaqarnikkut allaffissornikkullu pisortanut kingunissaat

Peqqussutissatut siunnersuut aningaasatigut pisortanut kinguneqarnaviangilaq.

Peqqussutissatut siunnersuutikkut allaffissorneq oqilisaanneqassaaq akimmi
allannguutaasa Aningaasaqarnermut Ataatsimiititaliamut saqqummiunneqartarnerat
suliassersuutaajunnaassamat.

Aningaasaqarnikkut allaffissornikkullu inuussutissarsiortunut kingunissai

Peqqussutissatut siunnersuut aningaasaqarnikkut allaffissornikkullu
inuussutissarsiortunut kinguneqarnaviangilaq.

Avatangiisinut sunniutaasinnaasunik naliliineq

Peqqussutissatut siunnersuut avatangiisinut sunniuteqassanngilaq.

Oqartussaqaarfii il.il. tusarniaavigineqartut:

Naalakkersuisut Allattoqarfiat
Akileraartarnermi Pisortaqaarfik
Aatsitassanut Ikummatissanullu Pisortaqaarfik
Aqutsinermut Pisortaqaarfik
Aningaasaqaarnermut Pisortaqaarfik
Naalakkersuisut Allattoqarfiata Inuussutissarsiornermut Immikkoortortaa
Aalisarnermut, Piniarnermut Nunaqaarfinnullu Pisortaqaarfik
Peqqinnissamut Pisortaqaarfik
Avatangiisinut Pinngortitamullu Pisortaqaarfik
Kultureqaarnermut, Ilinniartitaanermut, Ilisimatusarnermut Ilageeqarnermullu
Pisortaqaarfik
Isumaginninnermut Suliffeqaarnermullu Pisortaqaarfik
Nukissiorfiit
Inatsisileriffik

**Peqqussutissatut siunnersuummi aalajangersakkanut ataasiakkaanut
nassuiaatit**

§ 1-imut

Allassimasoq "*§ 3, imm. 4 atorunnaarsinneqarpoq.*" isumaqarpoq erngup akiisa allannguutaat atuutilinnginnerini Inatsisartut Aningaasaqaarnermut Ataatsimiititaliaannut akuerisassanngorlugit saqqummiunneqartarunnaassasut.

Tassa imaappoq suliassamik isumaginnittut innaallagissamut, imermut ungasissumillu kiassarneqaarnermut akigititaat, kiisalu nalunaarasuaateqaarnermut akigititaat, taamaallaat Naalakkersuisunut akuerisassanngorlugit saqqummiunneqartalissasut.

§ 2-imut

Siunnersuutigineqarpoq Inatsisartut peqqussutaat ulloq 1. juli 2002 atuutilissasoq.